

Badran bin Abdurrahman bin Muhammed Al-Honaihen, *Saudijska Arabija i Bosna i Hercegovina: odnosi u savremenom dobu (od 1992. do 2015. godine)*, Univerzitet u Sarajevu – Institut za historiju, 2026, 536 str.

*Saudijska Arabija i Bosna i Hercegovina: odnosi u savremenom dobu (od 1992. do 2015. godine)*, autora Badran bin Abdurrahman bin Muhammed Al-Honaihen, objavljena od strane Instituta za historiju UNSA 2026. godine, je prijevod doktorske disertacije, odbranjene 2018. godine na Univerzitetu Um al-Qura u Mekki, koja predstavlja vrijedan doprinos proučavanju saudijsko-bosanskohercegovačkih odnosa u savremenoj historiji. Djelo sistematično i dokumentirano obrađuje političke, diplomatske, humanitarne, ekonomske, kulturne i društvene aspekte tih odnosa, posebno u periodu bosanskohercegovačke krize i poslijeratne obnove. Njegovu naučnu vrijednost potvrđuje i Nagrada kralja Salmana bin Abdulaziza za postdiplomske studije iz historije i civilizacije Arapskog poluotoka, dok se istraživanje temelji na bogatoj, dijelom neobjavljenoj arhivskoj građi i svjedočenjima neposrednih učesnika historijskih procesa.

Zajedno sa uvodom i zaključkom, knjiga ima pet poglavlja. U uvodnom, prvom, poglavlju se obrađuju historijski počeci odnosa i veza između Saudijske Arabije i Bosne i Hercegovine, s posebnim osvrtom na period prije zvaničnog priznanja Bosne i Hercegovine. Autor najprije analizira razvoj prvih kontakata i saradnje, zatim daje širi pregled saudijsko-jugoslavenskih odnosa kao važnog političkog konteksta, te na kraju razmatra početak bosanskohercegovačke krize i okolnosti koje su prethodile ratu i međunarodnom priznanju Bosne i Hercegovine.

Sljedeće (drugo) poglavlje analizira razvoj političkih i diplomatskih odnosa između Saudijske Arabije i Bosne i Hercegovine, od prvih kontakata do različitih oblika međunarodne podrške BiH. Posebna pažnja posvećena je djelovanju Saudijske Arabije u Organizacija islamske saradnje i Vijeću za saradnju arapskih država Zaljeva, njenim diplomatskim inicijativama i konferencijama posvećenim pitanju Bosne i Hercegovine, kao i pomoći izbjeglicama. Poglavlje također obrađuje djelovanje Visokog saudijskog komiteta, posebno njegovu ekonomsku pomoć i podršku obnovi bosanskohercegovačkog društva.

Treće poglavlje obrađuje saudijsko-bosanskohercegovačke odnose u ekonomskom i društvenom segmentu, s fokusom na finansijsku i razvojnu pomoć Saudijske Arabije Bosni i Hercegovini, uključujući kredite i donacije Saudijskog fonda za razvoj, podršku međunarodnim razvojnim projektima te razvoj trgovinske razmjene između dvije zemlje. Četvrto poglavlje posvećeno je saradnji u oblasti kulture, obrazovanja i informisanja, pri čemu se analiziraju podrška kulturnim i obrazovnim institucijama, naučna saradnja, očuvanje kulturnog naslijeđa, uloga saudijskih medija u predstavljanju BiH, kao i značaj hadža i umre za povezivanje i unapređenje odnosa između dvije zemlje.

Ovo izdanje predstavlja vrijedan izvor istraživačima, studentima i široj stručnoj javnosti te daje mogućnosti za nova istraživanja međunarodnih dimenzija savremene historije Bosne i Hercegovine, kao i uloge diplomatske i humanitarne solidarnosti u vremenima dubokih društvenih i političkih kriza.